



Neovlašten promet cigareta bez akciznih markica

## Šestero uhapšenih u akciji Skuter

Pripadnici **Državne agencije za istrage i zaštitu (SIPA)** BiH uhapsili su jučer u akciji kodnog naziva Skuter šest osoba osumnjičenih za krivična djela organizovani kriminal i nedozvoljeni promet akciznih proizvoda, te zaplijenili veću količinu cigareta bez akciznih markica i novca, kao i druge predmete koji su upotrijebljeni za činjenje krivičnog djela, saopšteno je iz Tužilaštva BiH.

Akcija je provedena po nalogu Tužilaštva BiH na području Tuzle, Kalesije i Zvornika, a usmjerena je na više osumnjičenih osoba koje su pod istragom da su se, kao organizovana kriminalna grupa, duži period bavile neovlaštenim prometom cigareta bez akciznih markica koje su prodavale na teritoriji BiH.

“Na ovaj način osumnjičeni su pribavili novčanu korist u

većem iznosu u vidu neplaćenih indirektnih poreza i akciza na štetu budžeta BiH. Prilikom pretresa na više lokacija otkrivena je i zaplijenjena veća količina cigareta bez akciznih markica, koje su bile namijenjene za prodaju na crnom tržištu, kao i određena količina novca”, navodi se u saopštenju.

Nakon završetka operativnih aktivnosti, postupajući tužilac donijeće odluku o daljim aktivnostima u predmetu.

“Pripadnici **SIPA**, u saradnji s pripadnicima ministarstava unutrašnjih poslova Republike Srpske i Tuzlanskog kantona, jučer su od ranih jutarnjih sati provodili akciju Skuter u okviru borbe protiv organizovanog kriminala i nedozvoljenog prometa akciznih proizvoda”, saopćeno je iz Tužilaštva BiH.